

CONIMBRIA.



CONIMBRIA, vulgò, Coimbra, olim Regni Portugalliae caput, Veteribus quibusdam, Caliabria, alijs Colimbria, siue Colibria, etiam Coimbria Isidoro & Rosendio nuncupata, multis naturae & artis decorata splendoribus. Nam loco amoenissimo in rupe sita, vndique oliuarum syluis, veluti Aetheræ, quarum vicem hodie, quasi sustinet, vinetisq; cingitur; Ad Muliam, siue Mondam, aliàs Mondegam, fluum nobilem, sita, qui duas separatas vrbs partes ponte coniungit, qui sanè fluuius, præter Tagum & Duriam, in Lusitania præcipuus est: distat hæc vrbs ab huius fluuij ostio, quod ad occasum est, octo leucis, itinere per agros fertilissimos, frugumque feracissimos læto. Paruis interim cymbis, præsertim verno tempore nauigatur, tantam quippe arenæ copiam, præsertim verno tempore, secum trahit, vt cæcis vadis multis in locis abundet. Ripa verò, ea ex parte, vbi Monasterium S. Francisci est, silicibus referta, amoenissimas deambulationes efficit. Nam etsi Lusitaniæ ager, plerisque in locis horridus, argillosus, ac sterilis, huius tamen vrbs territorium, totius Regni optimum præstantissimumq; censetur. Montes, quos habet vicinos, Strada Altoba, patriotæ nominant, oliuis, vinetis, & omnis generis fructiferis arboribus, ad delectationem, & commodum referti. Quin & multis limpidissimæ aquæ fontibus Conimbria irrigatur, præcipuè verò aquæductu celebri à Rege Sebastiano Anno Salutis M. D. LXXII. maximo sumptu perfecto, Ex illo enim, ad altiorem vrbs collèm, qui à tergo Regiæ est, vbi forum Studiosorum existit, tanta clarissimæ & dulcissimæ aquæ copia in stagnum marmoreum infunditur, vt per omnes plateas totius anni tempore quasi torrens, ad varios ciuium vsus, & multas commoditates deriuetur. Quin & maiore felicitate Conimbria præstat, Cathedrali optimè fundata Ecclesia, & Vniuersali præstantissimarum artium studio, quod & loci amoenitas, & variorum præstantissimarum artium professiones cõmendant. Ibi enim Regijs stipendijs, Theologiæ, vtriusque Iuris, & Medicinarum Facultatis Professores, liberaliter fouentur ac salariantur. In quarum singulis, vt quotidianis prælectionibus Studiosi in officio contineantur, quatuor sunt Doctores ordinarij, qui accuratissimis & assiduis lectionum ac disputationum exercitijs, ad nitorem ac summam elegantiam, Studiosorum ingenia expoliunt. Sunt etiam publici & peculiare eruditarum linguarum professores, Humanitatis verò scientias, Patres Societatis IESV, accurata industria, & magno profectu docent, qui iuuentutem simul in pietate, & bonis literis erudiunt. Sunt hîc etiam quatuor Artium cursus, Louanienses Pædagogia; Colonienses, Burasas; Alij, Collegia nominant, in quib. Philosophica, Metaphysica, & Mathematica præleguntur. Sunt & alia à Prælati, magnisq; viris dotata, & instituta Collegia, quorum descriptio nimis longam narrationem exigit. Horum appellationes, in ipsa lamina, siue pictura, exprimuntur. Studiosi omnes, antiquas modestiæ, grauitatis, & scholarum leges in habitu obseruant, togati namque incedere coguntur, Magno, frequentique sunt numero. Priuata, à ciuibus separata, ac priuilegiata iurisdictione gaudent, In qua ædiles, præfectos, & iustitiæ administratores ex ipso Vniuersitatis gremio eligunt, Qui etiam in peculiari Vniuersitatis foro, pro tribunali præsent, ius dicunt, Et rerum venalium precia moderantur.